



REPUBLIKA E SHQIPËRISË

AGJENCIA PËR ZHVILLIM BUJQËSOR DHE RURAL

Nr. 3103 Prot.

Tiranë, më 12.10.2021

**RREGULLORE**  
**PËR HETIMIN ADMINISTRATIV TË KËRKESËS SË SINJALIZUESIT PËR**  
**MBROJTJEN NGA HAKMARRJA NË AZHBR**

**Tiranë, Tetor 2021**

## KREU I RREGULLA TË PËRGJITHSHME

### **Neni 1** **Baza ligjore**

Rregullorja për hetimin administrativ të kërkesës së sinjalizuesit për mbrojtjen nga hakmarrja në AZHBR, bazohet në ligjin nr. 60/2016 “Për sinjalizimin dhe mbrojtjen e sinjalizuesve”, Kodin e Procedurave Administrative, si dhe në bazë të urdherave të miratuara nga Drejtori i Përgjithshëm.

### **Neni 2** **Objekti**

Objekti i kësaj Rregulloreje është përcaktimi i rregullave për procedurën e shqyrtimit të hetimit administrativ të kërkesës së sinjalizuesit për mbrojtjen nga hakmarrja, në zbatim të ligjit nr. 60/2016 “Për sinjalizimin dhe mbrojtjen e sinjalizuesve”.

### **Neni 3** **Përkufizime**

Në këtë Rregullore termat e mëposhtëm kanë këto kuptime:

1. “Autoritet publik” ka të njëjtin kuptim me atë të dhënë në ligjin për të drejtën e informimit.
2. “Hakmarrje” është çdo veprim, i drejtpërdrejtë ose jo i drejtpërdrejtë, ose kërcënim, i kryer nga organizata, me natyrë diskriminuese, disiplinore ose që, në një formë tjetër të padrejtë, dëmton interesat e ligjshëm të sinjalizuesit dhe që rezulton nga sinjalizimi.
3. “I sinjalizuar” janë një ose më shumë persona, ndaj të cilëve bëhet një sinjalizim, sipas ligjit nr. 60/2016, në lidhje me një veprim ose praktikë të dyshuar korrupsioni.
4. “ILDKPKI” është Inspektorati i Lartë i Deklarimit dhe Kontrollit të Pasurive dhe Konfliktit të Interesave.
5. “Mbrojtje” është mbrojtja e sinjalizuesit nga hakmarrja, sipas mekanizmit të përcaktuar në kreun V të ligjit nr. 60/2016.
6. “NJPSB” ose “njësia përgjegjëse” është Njësia Përgjegjëse për Sinjalizimin e Brendshëm, strukturë e posaçeme brenda AZHBR, e përbërë nga tre punonjës të institucionit e ngarkuar

me detyrën e shqyrtimit të hetimit administrativ të sinjalizimit dhe shqyrtimin e kërkesës për mbrojtjen e sinjalizuesit, sipas përcaktimeve të këtij ligji.

7. “Organizatë” për këtë rregullore është AZHBR-ja.
8. “Sinjalizim” është raportimi i informacionit nga ana e sinjalizuesit tek njësi përgjegjëse ose ILDKPKI-ja për veprime apo praktika të dyshuara korrupsioni, të kryera në vendin e tij të punës në autoritetin publik apo subjektin privat.
9. “Sinjalizues” është individi, i cili aplikon ose është në marrëdhënie pune, ose ka punuar më parë pranë autoritetit publik apo subjektit privat, pavarësisht nga natyra e marrëdhënies së punës ose kohëzgjatjes së saj, si dhe nëse paguhet ose jo, që sinjalizon një veprim ose praktikë të dyshuar korrupsioni.
10. Struktura përgjegjëse- Struktura brenda AZHBR, që ka marrë masën ndaj sinjalizuesit.
11. “Veprim ose praktikë e dyshuar korrupsioni” është një veprim ose mosveprim, fakte ose rrethana të kryera në një organizatë, për të cilat sinjalizuesi dyshon në mirëbesim, sipas ligjit nr. 60/2016, se mund të përbëjë korrupsion.

## KREU II VEPRIMET PROCEDURALE

### Neni 4 Kryerja e veprimeve procedurale

1. Veprimet procedurale të NJPSB -së në AZHBR kryhen në përputhje me ligjin nr. 60/2016 dhe në rast të mosparashikimit nga ky ligj, sipas Kodit të Procedurave Administrative.
2. Njoftimet për veprimet procedurale, për të cilat NJPSB -ja në AZHBR cakton afate, duhet të përmbajnë paralajmërimin e shprehur mbi pasojat e mosrespektimit të afatit.

### Neni 5 Mbrojtja kundër hakmarrjes

1. Sinjalizuesi, i cili sinjalizon një veprim ose praktikë të dyshuar korrupsioni, sipas ligjit nr. 60/2016, mbrohet ndaj çdo masë hakmarrëse të marrë ndaj tij nga organizata, duke përfshirë, por pa u kufizuar në:
  - a. shkarkimin nga puna;
  - b. pezullimin nga puna, ose të një, ose më shumë detyrave;

- c. transferimin brenda ose jashtë organizatës;
  - d. uljen në detyrë;
  - e. uljen e pagës dhe/ose të shpërblimeve financiare;
  - f. humbjen e statusit dhe të privilegjeve;
  - g. mosngritjen në detyrë;
  - h. heqjen e së drejtës për të marrë pjesë në trajnime;
  - i. vlerësime negative në marrëdhënien e punës;
  - j. forma të tjera të hakmarrjes në lidhje me punën.
2. Çdo akt i hakmarrjes ndaj sinjalizuesit është i pavlefshëm.
  3. Nëse sinjalizuesi dëshiron të vendoset në një strukturë tjetër të organizatës, për të mbrojtur veten nga reagime armiqësore në mjedisin e tij të afërt të punës, paraqet kërkesë me shkrim tek Drejtori i Përgjithshëm i AZHBR-së dhe një kopje e saj i dërgohet Inspektorit të Përgjithshëm të ILDKPKI-së.
  4. AZHBR-ja merr masat e arsyeshme dhe të përshtatshme për të lehtësuar një lëvizje të tillë. Në rast të mos miratimit apo moskthimit të përgjigjes brenda 5 ditësh nga data e paraqitjes së saj, ILDKPKI-ja, me kërkesë të sinjalizuesit, menjëherë i drejtohet AZHBR, sipas legjislacionit në fuqi, për të marrë të gjitha masat, sipas këtij neni.
  5. Nëse AZHBR nuk merr masat e kërkuara, ILDPKI-ja i drejtohet me kërkesëpadi gjykatës kompetente.

### KREU III HETIMI ADMINISTRATIV

#### **Neni 6** **Procedura e hetimit të kërkesës për mbrojtje**

1. Sinjalizuesi, i cili pretendon se është subjekt i një akti hakmarrjeje, fillimisht duhet të paraqesë kërkesë për mbrojtje tek njësia përgjegjëse NJSPB në AZHBR.
2. Nëse NJPSB-ja pranë AZHBR-së nuk është krijuar/nuk funksionon sinjalizuesi që pretendon se është subjekt i një akti hakmarrjeje i drejtohet drejtpërdrejtë ILDKPKI-së.
3. Njësia përgjegjëse NJPSB merr menjëherë masat dhe në çdo rast, jo më vonë se 10 ditë nga paraqitja e kërkesës, vendos me akt të ndërmjetëm të arsyetuar për riparimin e pasojave të paligjshme nga akti i hakmarrjes. Në rast të shkeljes së këtij afati, kërkesa e sinjalizuesit paraqitet tek ILDKPKI-ja, që vendos brenda 10 ditëve nga marrja e kërkesës për riparimin e

pasojave të paligjshme të aktit të hakmarrjes.

#### **Neni 7**

#### **Hetimi administrativ dhe barra e provës**

1. NJPSB-ja pranë AZHBR-sëheton administrativisht pretendimet për hakmarrje për të përcaktuar nëse ka shkaqe të arsyeshme për të besuar që ka ndodhur, është duke ndodhur, ose pritet të ndodhë një akt hakmarrjeje.
2. NJPSB-ja në hetimin administrativ, i kërkon me shkresë strukturës përkatëse që preket nga sinjalizimi të provojë që masat e marra në dëm të sinjalizuesit janë bazuar në shkaqe të ndryshme dhe që nuk lidhen në mënyrë të drejtpërdrejtë ose të tërthortë me sinjalizimin. Struktura përgjegjëse ka barrën e provës në këtë proces dhe i përgjigjet NJPSB -së me shkrim brenda 10 ditësh nga data e marrjes së kërkesës.

#### **Neni 8**

#### **Bashkëpunimi**

1. AZHBR dhe sinjalizuesi bashkëpunon me ILDKPKI-në në përcaktimin e fakteve dhe rrethanave të nevojshme për zgjidhjen e çështjes së aktit të hakmarrjes ndaj sinjalizuesit. AZHBR është e detyruar të paraqesë informacione, prova, dokumente, deklarata apo për t'u paraqitur personalisht përpara ILDKPKI-së.
2. Organizata çdo deklaram apo argument të saj e paraqet me shkrim.

#### **Neni 9**

#### **Mjetet e kërkimit të provës**

1. Gjatë hetimit administrativ NJPSB--ja me qëllim përcaktimin e gjendjes së fakteve dhe rrethanave që kanë lidhje me çështjen mund:
  - a. të mbledhë deklarata nga palët, dëshmitarët dhe ekspertë;
  - b. të marrë dokumente dhe dokumente të tjera të dokumentuara nëpërmjet mjeteve fotografike, të regjistrimit ose mjeteve të tjera teknike;
  - c. të vizitojë vende të caktuara.
2. Kur një provë, nga e cila varet zgjidhja e çështjes së aktit të hakmarrjes ose që ndikon në sqarimin e saj, ka rrezik të zhduket ose të vështirësohet ose bëhet e pamundur marrja e saj, NJPSB--ja kryesisht apo me kërkesën e sinjalizuesit, mund të vendosë marrjen më parë të kësaj prove (sigurimi i provës).

3. NJPSB-ja që zhvillon procedurën administrative mund të vendosë sigurimin e provës edhe përpara fillimit të procedurës administrative. Sigurimi i provës mund të bëhet edhe në çdo fazë të procedurës administrative. Përgjegjësia për sigurimin e provave bie mbi NJPSB-në.

#### **Neni 10**

##### **Njoftimi i sinjalizuesit**

1. NJPSB-ja njofton me shkrim sinjalizuesin brenda 10 ditëve nga data e marrjes së kërkesës për statusin e hetimit administrativ të kërkesës për mbrojtje dhe për çdo veprim procedural të ndërmarrë.
2. Pavarësisht nga afatet e njoftimit, NJPSB-ja është e detyruar t'i përgjigjet çdo kërkesë për informacion me shkrim, paraqitur në çdo kohë nga sinjalizuesi në lidhje me kërkesën e tij.

#### **KREU IV**

##### **AFATI PËR PROCEDURËN E HETIMIT**

#### **Neni 11**

##### **Masat në përfundim të hetimit administrativ**

1. Nëse në përfundim të hetimit administrativ rezulton se është kryer një akt hakmarrjeje ndaj sinjalizuesit nga struktura përgjegjëse, NJPSB-ja drejtohet me shkrim Drejtorit të Përgjithshëm të AZHBR, për të urdhëruar strukturën përgjegjëse për marrjen e të gjitha masave për riparimin e shkeljes së kryer. NJPSB-ja parashikon në shkresë edhe rekomandimin konkret për llojin e masës që duhet të merret. Njëkohësisht NJPSB-ja për përfundimin e hetimit administrativ vë në dijeni ILDKPKI.

#### **Neni 12**

##### **Afati i përfundimit të hetimit administrativ**

Procedura e hetimit administrativ të kërkesës për mbrojtje nga hakmarrja përfundon sa më shpejt të jetë e mundur dhe në çdo rast jo më vonë se 60 ditë nga data e regjistrimit të kërkesës.

Kjo Rregullore hyn në fuqi menjëherë.

**DREJTORE E PËRGJITHSHME**

**Eranda Selmanaj**



**FORMULAR KËRKESË PËR MBROJTJE NGA HAKMARRJA**  
(në zbatim të ligjit nr. 60/2016 “Për sinjalizimin dhe mbrojtjen e sinjalizuesit”)

1-Unë sinjalizuesi \_\_\_\_\_, lindur më \_\_\_\_\_, vendlindja \_\_\_\_\_, banues në adresën: \_\_\_\_\_ dhe me kontakte \_\_\_\_\_, me detyrën e \_\_\_\_\_ në \_\_\_\_\_, kam paraqitur sinjalizimin në:

a) AZHBR, pranë Njesisë përgjegjëse të Sinjalizimit të Brendshëm;

b) ILDKPKI  
(Bashkëlidhur formulari i sinjalizimit të bërë)

2-Për shkak të këtij sinjalizimi, pretendoj se jam subjekt i një akti hakmarrjeje të marrë ndaj meje si më poshtë:

Me \_\_\_\_\_ në

AZHBR \_\_\_\_\_

për shkak se ndaj meje është marrë masa e \_\_\_\_\_  
(bashkëlidhur nëse keni akt shkresor për këtë gjë ose tregoni ku gjendet ai).

Në këto kushte mbështetur në nenin 18 dhe 19 të ligjit nr. 60/2016 “Për sinjalizimin dhe mbrojtjen e sinjalizuesve” paraqes kërkesën për mbrojtjen nga akti i hakmarrjes ndaj meje, pranë;

1.Njesisë përgjegjëse në AZHBR.

2-ILDKPKI, për shkak se;

- a) Nuk ka Njësi përgjegjëse në AZHBR
- b) Njesia përgjegjëse nuk ka marrë masat brenda afatit ligjor 10 ditor, nga paraqitja e kërkesës për mbrojtje nga sinjalizuesi.(Bashkëlidhur kërkesa për mbrojtje e paraqitur tek njësia përgjegjëse).

1-Ky formular kërkesë për mbrojtje nga hakmarrja, u mor në dorëzim më /\_\_\_/\_\_\_ nga \_\_\_\_\_, punonjës i njesisë përgjegjëse në AZHBR.

Sinjalizuesi  
Emër Mbiemër

Njësia përgjegjëse  
Emër Mbiemër

2-Ky formular kërkesë për mbrojtje nga hakmarrja u mor në dorëzim më /\_\_\_/\_\_\_, në \_\_\_\_\_ nga \_\_\_\_\_, Inspektor në ILDKPKI.

Sinjalizuesi  
Emër Mbiemër

Inspektor  
Emër Mbiemër